

四庫全書

集部

欽定四庫全書

新安文獻志卷四十

明 程敏政 撰

檄

與僕射鄭畋告諸鎮討黃巢檄

程宗楚

夫屯亨有數否泰相沿如日月之蔽虧似陰陽之愆伏
是以漢朝方盛則莽卓肆其奸凶夏道未衰而羿澆騁
其殘酷不無僭越尋亦誅夷妖孽之生古今難免代有

忠貞之士力為匡復之謀我國家應五運以乘乾躡三王之垂統綿區飲化西宇歸仁十八帝之鴻猷銘於神鼎三百年之膏澤播在人謠加以政尚寬弘刑無枉濫翼翼勤行於王道孜孜務恤於生靈足可傳寶祚於無窮御瑤圖於不朽近歲螟蝗作害旱暵延災因令無賴之徒遽起亂常之暴雖加討逐猶肆猖狂草賊黃巢奴僕下才豺狼醜類寒耕熱耨不厲力於田疇媮食靡衣務偷生於剽奪結連凶黨驅迫平人始擾害於里閭遂

侵陵於郡邑屬以藩臣不武戎士貪財徒加討逐之名
竟作遷延之役致令滋蔓累有邀求聖上愛育情深含
弘道廣指萬方而罪已用百姓以為心假以節旄委之
藩鎮冀其俊革免困疲羸而殊無犬馬之誠但恣蟲蛇
之毒虔劉我征鎮覆沒我京都凌辱我衣冠屠殘我士
庶視人命有同於草芥謂大寶易取如奕棋而乃竊據
宮闈偽稱名號爛羊頭而拜爵續狗尾以命官燕巢幕
以誇安魚在鼎而猶戲殊不知五侯拗怒期分項羽之

欽定四庫全書

新安文獻志
卷四十

二

屍四冢旣成待葬蚩尤之骨猶復廣侵田宅濫蓄貨財
比溪壑以難盈類烏鳶而縱攫茫茫赤縣僅同甌駱之
鄉惴惴黔黎若在狴牢之內人神共怒行路傷心旼謬
領藩垣榮兼將相每枕戈而待旦常泣血以忘飧誓與
義士忠臣共剪狐鳴狗盜近承詔命會合諸軍皇帝親
御六師卽離三蜀霜戈萬隊鐵馬千羣雕虎嘯以風生
應龍驤而雲起淮南高相公會關東諸道百萬雄師計
以夏初會於關內旼與宗楚暨同盟秦州節度使仇公

遇鄜延節度使李孝昌夏州節度使拓跋思恭等已驅
組練大集關畿爭麾壘上之蛇矛待掃關中之蟻聚而
吐蕃党項以久濡皇化深憤國讐願以沙漠之軍共獻
盪平之捷此際華戎合勢藩鎮連衡旌旗煥爛於雲霞
劍戟晶瑩於霜雪莫不持繩待試賈勇爭先思垂竹帛
之功誓雪朝廷之耻矧茲殘孽不足殄除况諸道世受
國恩身縻好爵皆貯興邦之畧咸傾致主之誠自函洛
造氛鑾輿避狄莫不指銅駝而背裂望玉壘以魂消聞

此勤王固宜投袂更希憤激速殄寇讐永圖社稷之勲
以報君親之德迎鑾反正豈不休哉

廣明元年
三月甲子

為晉王李存勗諭邢洺衛博諸州討朱溫檄

程巖

王室遇屯七廟被陵夷之酷昊天不弔萬民罹塗炭之
災必有英主奮庸忠臣仗順斬長鯨而清四海靖祲
以泰三靈予位忝維城任當分閫念茲顛覆詎可晏安
故仗桓文輔合之規問羿浞兇狂之罪逆溫碭山庸隸

巢孽餘兇當僖宗奔播之初先大王掃平之際東身泥
首請命牙門苞藏姦詐之心惟示婦人之態先大王俯
憐窮鳥曲為開懷特發表章請帥梁汴纔出葦蒲之澤
便居茅社之尊殊不感恩遽行猜忿我國家祚隆周漢
迹盛伊唐二十聖之鎡基三百年之文物外則五侯九
伯內則百辟千官或代襲簪纓或門傳忠孝皆遭毒害
永抱沉寃且鎮定兩藩國家巨鎮冀安民而保族咸屈
節以稱藩逆溫唯仗陰謀專行不義欲全吞噬先據屬

州趙州特發使車來求援助予情惟溢寇義切親仁躬
率賦輿赴茲盟約賊將王景仁將兵十萬屯據栢鄉遂
驅三鎮之師授以七擒之畧鸛鷺纔列梟獍大奔易如
走坂之丸勢若燎原之火僵屍仆地流血成川組甲雕
戈皆投草莽謀夫猛將盡作俘囚羣兇旣快於天誅大
憝須垂於鬼錄今則選蒐兵甲簡練車徒乘勝長驅翦
除元惡凡爾衛博邢洺之衆感恩懷義之人乃祖乃孫
為聖唐赤子豈徇虎狼之黨遂忘覆載之恩益以封豕

長蛇憑陵薦食無方逃難遂被脅從空膏膽以銜冤竟
無門而雪憤旣聞告捷想所慰懷今義旅徂征止于招
撫昔耿純焚廬而向順蕭何舉族以從軍皆審興亡能
圖富貴殊勲茂業翼子貽孫轉禍見機決在今日若能
詣轅門而效順開城堡以迎降長官則改補官資百姓
則優加賞賜所經誣誤更不推窮三鎮諸軍已申嚴令
不得焚燒廬舍剽掠馬牛但仰所在生靈各安耕織予
恭行天伐罪止元兇已外歸明一切不問凡爾士衆咸

諒予懷

天祐八年正月

代岳制使飛移河南郡縣討劉豫檄

胡閔休

契勘劉豫竊據汴都僭稱偽號舊蒙任使累忝臺臣是
宜圖報國家執節效死乃敢背棄君父無天而行以祖
宗涵養之恩翻為仇怨昧臣子忠貞之義甘作渠魁紫
色餘分擬亂正統想其面目何以臨人方且妄圖襄漢
之行欲窺川蜀之路專犯不韙自速誅夷我聖朝厄運

已銷中興在即天時旣順人意悉諧所在皆賈勇之夫
思共快不平之忿今王師已盡壓淮泗東過海沂驛騎
交馳羽檄疊至故我得兼收南陽智謀之士提大河忠
孝之人仗義以行乘時而動金洋之兵出其西荆湖之
師繼其後雖同心一德足以吞彼圍之梟羣然三令五
申豈忍殘吾宋之赤子爾應陷沒州縣官吏兵民等元
非本意諒皆脅從屈於賊威歸逃無路我今奉辭伐罪
拯溺蘇枯惟務輯安秋毫無犯儻能開門納款肉袒迎

降或願倒戈以前驅或列壺漿而在道自應悉仍舊章
不改職業盡除苛政咸用漢條如或執迷不悟甘為叛
人喉跖犬以吠堯詈獵師而哭虎議當躬行天罰迅掃
兇頑禍並宗親辱及父祖挂今日之逆黨遺千載之惡
名順逆二途蚤宜擇處兵戈既逼雖悔何追謹連黃榜
在前各令知悉

紹興六年二月日○按胡制機閣休在
岳王幕下最久凡表奏軍書多出閣休

此檄與金陀粹
編所載小異

表箋奏
附

代并州長史張仁亶進九鼎銘表

吳 缺

臣聞鼎者夏后氏作羣牧貢金遠方圖物備諸山澤以
禦魑魅厥後嗣德昏亂鼎遷于商夏之寶也杞不足徵
殷既有之又終失之周之休明神寶不墜百代可繼伏
惟陛下光大而當之若乃崇貴之器金玉之鼎銘首山
發睢上列太廟序明堂克明靈命以奉上帝非愚臣所
敢議臣聞禮之興也始諸飲食故先王之制曰舉九鼎

蓋筠藥淳熬澄瀝膏餌御九州之美順四時之和臣所以征繕北金敢貢新鼎夫有器必有名臣竊見九州同迺述九號夫永昌天中所以基皇周也長安及岐所以紀靈瑞也武興建都所以光帝閔也禮曰觀禪云云所以美升中也少陽載青所以冀儲德也東原底平所以廣封植也江都淮海所以肆朝宗也江陵作鎮所以制荆蠻也成都輿區所以通珍貢也夫此九者誠不足掄衍鴻休昭振方統庶覩者美其所稱知有由作微臣朽

老不達有慙歌頌厯八命之寵章負中軍之重任匪躬
厥獻伏表流汗其九鼎銘謹敢列上遣某官某奉鼎以
聞

謝罷符寶郎通判宣州表

汪藻

衆惡必察宜卽嚴誅罪疑惟輕止從薄責袞袞誤登於
臺省漂漂復返於江湖伏念臣家世故寒材能極陋竊
慕古人之力學偶陪多士以進身編蠹簡之十年最為
椎鈍隸鸞臺之一月俄致顛躋繇非才冒處於必爭故

公論不容而交擊猥煩簡札有玷簪紳尚依魚稻之鄉
獲近粉榆之壤若非洪造豈有餘生茲蓋伏遇皇帝陛
下博採智能疏觀情實謂虛船觸舟而褊心不怒雖若
無他然彊弩射市而薄命先遭莫非自取姑捐稍廩使
活妻孥臣敢不仰佩訓懲俯深循省日嬰簿領甘為俗
吏之沉迷坐置銘詩誓復平生之玷缺

謝進書特授左中大夫表

汪藻

臣某言伏奉告命以臣再修到元符庚辰所編詔旨等

特授臣左中大夫者國史補亡雖日勤於采獲君恩馭
幸乃歲冒於遷除矧方抱於遺弓恐獨榮於載筆上還
不獲退省為憂恭以太上皇帝聖學高明天資仁厚承
熙洽百年之後享安榮兩紀之餘凡今言動之所傳視
古詩書而無愧祇緣誤國之相繼循致陟方而不還既
海隅皆服於堯喪宜柱下一新於漢注風蒙垂付適幸
纂成豈謂皇帝陛下明發有懷兼收罔棄嗟夏時之既
失於杞莫稽幸商頌之復全以那為首特懋存書之賞

猥霑承學之臣敢不仰奉殊私俯殫繇力裒中朝副墨之要俟良史殺青之求穆王御駿以來歸已孤此望孔子感麟而有作尚見其人

謝封新安郡侯表

汪藻

臣某言准告命伏蒙聖恩以宗祀赦文授臣新安郡開國侯加食邑三百戶者禮洽中天慶覃外服猥奉十行之詔就加五等之封伏念臣積冒恩私浸踰分願昨投閒於異縣蒙起廢於偏城久客還家方憇南飛之鵲通

侯授印忽成左顧之龜雖滲漉以惟均何遭逢之獨異
茲蓋伏遇皇帝陛下調和萬類藩飾羣工屬宣室之受
釐罄寰區而蒙福臣適臨本郡仍昨鄉州宋人泝潞以
得封望胡及此漢將銀黃而夸里榮乃過之寵旣逮於
子孫忠敢移於生死

泉州到任謝表

汪藻

恭承休命就易名藩去父母之邦接浙敢同於他國問
蠻夷之俗褰帷如在於中州責重捫心恩深隕涕伏念

臣昨從祠館叨領守符素號迂踈無問馬及羊之智乃蒙安便得維秦與梓之州二年而勞力勞心一身而畏首畏尾力祈罷免反冒遷除雖賣劍買牛老猶堪於渤海然舉頭見日身益遠於長安茲蓋伏遇皇帝陛下總覈百工照臨萬國眷方隅之瀕海須師帥之得人故遣近臣往綏遐俗況今閩徼莫盛泉山旣旁接書文之同當尤懲獄市之擾臣敢不仰遵寬大俯厲衰殘講求百粵之宜叅諸禹貢奉上三年之計對以春秋

秀州謝上表

程俱

准勅除臣直祕閣權發遣秀州軍州事臣已於今月十五日到任上訖初布條綱具宣德意所憂綿薄莫副使令伏念臣幼而奇孤長益頑鈍上書論事空懷報國之心竊祿代耕每盡守官之義挂名邪籍為世僇人晚陪英俊之躔浸冒典章之選再遊東觀愧劉郎之復來三至南宮知馮生之已老遭時之變振古未聞窮獨餘生憂憤不死卧家請急投劾丐歸敢於顛危不安之時而

當綿蕞草創之事既遂顓愚之守復瞻天日之中喜不自勝死無所恨顧惟敝邑實介大邦征賦之入有經而不時之須沓至盜賊之憂方熾而即戎之備未修念憤驕凋敝之餘莫若利其銜勒而匱竭瘡痍之後又當事於撫摩靖言以思寧免於咎收此桑榆之景終繫覆載之仁此蓋伏遇皇帝陛下嘗膽濟時厲精圖治闢至公之路方因任於羣材念無競維人故兼收於片善致茲疵賤亦不棄遺臣敢不行其所知施於有政使公綽為

趙魏之老於用或優而陽城躬撫字之勞自知甚拙唯當竭力少謝素餐

除徽猷閣待制謝表

程俱

臣某言伏奉告命授臣依前左朝奉大夫充徽猷閣待制差遣餘如故臣尋具奏辭免准尚書省劄子奉聖旨不允臣已望闕祇受訖者竊祿真祠久慙素食升華延閣復玷清班仰戴聖恩俯慙非據伏念臣才非康濟性實戇迂仕則慕君不自量其愚賤學思為已期無玷於

操修不敢枉尺以直尋率常進寸而退尺名書邪籍知
芹獻之已踈力盡陳編愧管窺之時見晚逢睿哲驟辱
獎知拯之水火之中召自漁樵之野冠蓬山之衆俊已
媿無堪陟鳳閣之華資深知不稱仍持末學入侍清光
塵飛何益於泰山螢照難施於赫日曾微補報自取譴
訶庇身俾託於殊庭就食卽安於故里感恩念咎却掃
杜門想魏闕以馳神卧漳濱而永歎何圖洪造曲記孤
蹤不遺簪履之餘復置論思之列懇辭不遂成命莫回

昔張敞以罪廢屏居卒見收於後效劉毅雖年耆偏疾
亦不棄於公朝顧臣何人有此厚幸此蓋伏遇皇帝陛
下乾坤侔大日月並明沛然雨露之施渙若風雷之發
春生秋肅莫非成物之仁賞慶刑威咸出至公之造求
賢用吉士方遠迹於周王嘉善矜不能每同符於古訓
市骨冀來於駟駿采葑無間於卑微有如慙愚弗忍遐
棄臣敢不永思報稱仰服恩榮顧雖顛沛之間無忘素
守苟有捐糜之會敢愛餘生臣無任

謝轉一官致仕賜對衣金帶鞍馬表

金安節

仕合引年亟上還於官政恩深優老重蕃錫於寵章伏
念臣名玷儒科迹塵官簿夙際中天之運首蒙太上之
知一去臺綱七更歲閏和歸來之賦將了餘生哦羈宦
之詩已如隔世迄更張於大化適收召於孤蹤曾靡賢
勞更陞法從矧英主大有為之日實能臣勉出力之時
而臣晚晚凋齡婆婆婆餘蔭雖耿耿之尚在顧番番之益

愆爰布腹心願丐骸骨謝事而猶加以職辭榮而反陟
其官逮進謝於明廷復併叨於殊錫俾耀服乘之飾歸
為閭里之榮臣雖老丘樊敢忘魏闕長舉頭於聖日冀
沒齒於恩波帝所歸來莫續鈞天之夢田間息偃尚賡
擊壤之歌

遺表

汪大猷

引經告老粗適餘齡養疾喪生倏遺聖世夙喻有涯之
理敢輸垂絕之言伏念臣素守樸忠謹傳清白思陵策

欽定四庫全書

新安文獻志
卷四十

十四

士由延賞而踵世科孝廟應期自冗僚而登朝籍驟膺
膺簡屢玷親除郎省麟臺安有服勤之譽經帷鶴禁初
何勸講之功進職秋官濫居銓部代匱六卿之長坐叨
五使之華深懼滿盈力祈閒散班聯次對暫安祠館之
居詔趣起家疊擁泉麾之命峻西清而寓直畀南紀以
分符偶督捕之有愆致謫居之寢久皇恩洪施稍刊丹
籍之名慈極寵光盡復青氍之舊桑榆既迫蒲柳先零
爰稽陳力之文冒遂乞骸之請年踰五袞仕歷四朝頒

茗劑於上方錫餽羊於鄉國聳聞未央宮之慶又叨大
學士之除荷寵疏之沓來徒撫躬而增愧俄有采薪之
疾遂懷過隙之嗟定數莫逃遺忠未泯伏願皇帝陛下
憲章列聖兢業萬機收英俊以圖治功獎忠誼以作士
氣問安侍膳崇孝養以有加圖大宅中輩丕基於不拔
葆願閑燕冲毓粹和臣期逼蓋棺志存結草魂遊岱嶽
將先朝露之晞目斷神京徒枉明時之戀

辭免江東運副奏狀

朱 熹

右熹見任主管西京嵩山崇福宮忽於今月九日準尚書省劄子奉聖旨朱熹除江東轉運副使填見闕不候受告疾速之任任滿前來奏事熹聞命震驚不知所措伏念熹空疎無取疾病早衰入仕四十餘年止是循常竊祿本無奇節可以踰人徒以屢蒙恩私橫加除用間有非其分之所當得非其力之所能堪者不得不控辭以干朝聽而傳聞不察指目多端獨荷壽皇天日之照臨許全素守又辱聖主雲章之藻飾誤借寵褒遂得偷

安里間畢願香火在於愚分已極叨踰不謂聖恩記憐
遂加任使仰惟始初清明之日正是賢智馳驚之秋顧
雖殘廢之餘豈不願效尺寸實以積衰既久百恙交攻
心斃形疲視昏聽重竊自揣度決然不堪一路耳目之
寄若不祈哀丐免必致自取顛隤兼熹祖鄉徽州正屬
本路見有墳墓宗族田產在婺源竊慮在法亦合回避
欲望朝廷洞照本末曲為敷奏特與追寢新命令熹復
還故官庶幾少安愚賤之迹則熹不勝千萬幸甚

落職罷宮祠謝表

朱熹

臣熹言臣前任秘閣修撰提舉南京鴻慶宮今年五月十三日已該滿罷至二十七日伏準尚書省慶元二年十一月劄子節文臣寮論臣罪惡乞賜睿斷褫職罷祠奉聖旨依臣已於當日謝恩祇受訖者罪多擢髮分甘兩觀之誅量極包荒姑示片言之貶逮復尋於白簡始知麗於丹書鐫延閣論撰之名輟真祠香火之奉茲為輕典允賴洪私捧戴奚勝感藏曷喻伏念臣草茅賤品

江海孤生蚤值明時已誤三朝之眷獎晚逢興運復叨
上聖之深知召自藩維擢參帷幄略無可紀足稱所蒙
暨遠去於朝行卽永歸於農畝然猶賦之秩祿使庇身
於卜祝之間寔在清流容廁迹於圖書之府所宜恭恪
或追悔尤乃弗謹於彝章致自投於寬網果煩臺劾盡
發陰私上瀆宸嚴交駭聞聽凡厥大譴大訶之目已皆
不忠不孝之科至於衆惡之交歸亦乃羣情之共棄而
臣憤眊初罔聞知及此省循甫深疑懼豈謂乾坤之造

獨回日月之光略首從之常規旣俾但書於薄罰稽首
終之明訓儻許卒遂其餘生是宜衰涕之易零已覺大
恩之難報此蓋伏遇皇帝陛下堯仁廣覆舜哲周知謂
表正於萬邦已極忠邪之判則曲全於一物未傷黜陟
之公遂使冥頑獲逃竄殛臣敢不涵濡聖澤刻厲愚衷
雖補過以修身無及桑榆之暮景然在家而憂國未忘
葵藿之初心

落秘閣修撰依前官謝表

朱 熹

臣熹言臣昨於慶元三年正月二十七日準尚書省劄子節文臣寮奏臣罪惡乞與褫職罷祠奉聖旨依劄臣照會臣即於當日望闕謝恩解罷職名仍奉表稱謝去訖今於某月某日復準都進奏院遞到某月某日告命一道付臣落秘閣修撰依前官者彈文上徹已幸免於嚴誅詔墨下頒復寵加於明訓閱時既久祇命惟新感極涕零懼深首隕伏念臣草茅賤士章句腐儒唯知偽學之傳豈適明時之用頃叨任使已屢奏於罔功旋卽

便安復未能於寡過致煩重劾盡掎宿愆謂其習魔外之妖言履市廛之汙行有母而嘗小人之食可驗恩衰為臣而高不事之心足明禮闕以至私故人之財而納其尼女規學官之地而改為僧坊諒皆考覈以非誣政使竄投而奚憾不虞恩貸乃誤保全第令少避於清班尚許仍居於散秩慙璽書之來下恍歲律之還周視要囚詎止於旬時蓋存遷就逮數惡難從於末減猶聽省循口誦以還心銘敢墜此蓋伏遇皇帝陛下仁兼覆載

明極照臨作福作威總大權而在已曰賢曰佞付公論
於得人謂罰刑固足以懲姦而播告豈容於匿指式敷
顯號徧警具寮臣敢不深省昨非細尋今是年齡晚晚
雖悲後效之無期肝膽輪困尚喜孤忠之有在誓堅死
守覲答生成

靖州謝賜厯日表

朱晞顏

魚符攝守念正遠於天顏鳳厯明時適肇新於歲首恭
頌正朔丕變蠻風恭惟皇帝陛下繼聖凝資法天行化

在璣衡而取則解琴瑟以更張協氣周流天連珠而合
璧華風遠暨民奠枕以安孟豈惟邊徼之心歸已覺豐
年之氣應臣暫承寄委職在承宣化國之日舒長敢忽
民時之授諸福之物畢至益知國祚之昌

靜江府謝賜手詔墨本表

朱晞顏

雲漢為章于天豈特堯言之誕布皇極其訓惟帝固將
洛畫以同藏凡預聽聞悉知砥礪恭惟皇帝陛下光膺
大寶規恢遠圖道術作新於人才云為不徒於文具振

苟簡誕謾之俗張禮義廉恥之維聰明睿知足以有臨
方躬行於當宁號令文章煥焉可述宜風動於寰區臣
仰服訓詞詎忘奮厲炳然聖作如瞻咫尺之天威逖爾
蠻方敢不咨詢於民瘼

鄂州到任謝表

羅 願

奏事之官幸天威之密邇承恩易守驚地望之過優徒
積感藏未知報稱伏念臣早緣世緒叨奉官箴自憐斷
斷之愚第有惓惓之志茲輒行於雙劍蒙改畀於一麾

張敞漢世之能臣初淹閒郡西華孔門之高弟僅願小
邦深愧往賢驟當劇使眷荊州之內壤推鄂渚之上流
星萃使華雲屯禁旅武昌夏口傳誇三國之地形漢廣
江沱均被二南之風化矧皇明之所暨兼歲事之既升
士馬飽騰稻魚豐賤惟是五方之雜錯或假并容加以
四野之平寬更宜勸相非夙懷於長慮曷少副於鴻私
恭惟皇帝陛下盛德日新至仁天覆不以內外重輕而
略千里之寄不以國家閒暇而忘一日之虞益求循茂

之才同遵法度之治豈期絲薄亦與選除臣當恭聽訓
詞明宣德意遐不謂矣永堅愛上之忠心誠求之當得
字人之術

進易解表

王 炎


韋編淵永非淺識之能通斧扆天高覬邇言之致察妄
陳末學上瀆聖聰竊以道載於經易為之祖馬圖示象
犧畫成文首開天地之秘藏微顯帝王之妙用六爻以
變乃分西伯之二篇八索既除迭有東家之十翼發揮

不隱垂示無窮幽至於行乎鬼神顯足以措諸事業遭秦虐政僅為卜筮之書在漢諸儒未達乾坤之蘊末流浸甚本旨俱亡雖竭心思各持臆見京孟失之譎詭是生讖緯之端王韓矯以清虛偏雜老莊之說紛紛如是泯泯至今欲扶正學以示人亦有儒先之名世然繫辭精矣可信而翻疑且互體昭然當詳而反略或說明而義淺或語約而理偏通於數者不及玩辭釋其辭者又迷立象自出新意乃捭闔以為奇兼拾舊聞復支離而

多鑿微臣何者獨學無師念先人老死於窮閭以經術
竊傳於諸子因斯憤悱晚益鑽研味微言於六十四卦
之中望先聖於數千百年之上參之衆說折衷良難斷
以已私顓門何取閱朝華之易謝歎春木之方苞卦有
畫則其象具存象有意則非辭莫達是謂以蠡而測海
烏能得兔而忘蹄幸世道之交興逢聖明之有造微如
燭火何裨日出之輪動以震風亦發地鳴之籟茲蓋伏
遇皇帝陛下體乾精粹用資文明比附得民鼎新凝命

悅親有道率由豫順之和接下思恭務盡謙光之美升
羣賢而交泰育萬物以由頤節不傷財旅無留獄飭法
於豐亨之後除戎於萃聚之時善皆出於中孚動不聞
於小過以成大有之盛而消未濟之憂行三聖之所傳
莫非自得笑九師之甚陋安用多談尚蘄盛德之日新
不恃成能之天縱亶亶政機之少暇孜孜經幄之多聞
既知矣而重知故聖焉而益聖仰望虎生而文煥學兼
極於高明俯惟馬老則智專見終慚於精博第大道或

存於稊稗而先民亦采於蒔蕘成篇頗極於辛勤敷奏
覲塵於乙覽持周璞而過鄭賈本自堪嗤用燕說而談
郢書或能偶中



新安文獻志卷四十

欽定四庫全書

集部

新安文獻志卷四十一至四

詳校官中書臣丁榮祚

侍讀臣孫球覆勘

總校官庶吉士臣倉聖脉

校對官中書臣吳甸華

謄錄監生臣張魯秀

欽定四庫全書

新安文獻志卷四十一

明

程敏政撰

表

表附

代峽州守臣謝賜曆日表

汪雄圖

統正朔於一王式彰無外執玉帛者萬國疇敢不祗課
端自於清臺頒靡遺於遠服望虎闈而拜賜啓鳳卷以
遵行恭惟陛下建極福民對時育物如舜之齊七政辰
克撫凝嗣禹而叙九疇紀爰協用定郊鄩之鼎而厯踰

周卜分羲和之宅而命謹堯咨歲八千為一春為一秋
各從其類朞三百有六旬有六日皆聚此書欲令承流
宣化之臣咸究作事厚生之本寵形寶軸輝動山城敢
不嘉與黔黎恪循清問歲月日時無易邦家用慶於平
康水火金木惟修土穀益勤於勸課

代賀平吳曦表

程 秘

殘寇浸平方講內修之政狂童忽橫輒干自殄之誅宗
社叶休人神共快臣仰思列聖積累之盛實基萬世延

洪之休率土承有截之風含生知向內之義疇謂元惡
敢包禍心忘公朝亭育之恩墮私門忠孝之緒三靈憤
怒九牧囂騰果在須臾悉就摧剪茲蓋恭遇皇帝陛下
聖武不殺至仁好生雖神戈不至於坤維而皇靈如赫
於天際仍俾脅從之類咸染蕩滌之恩灑然污染之區
熙若清寧之地臣肅將明指幸會熙辰此日藁街已正
鯨鯢之戮他年渭上更來氈毳之朝

南康軍到任謝表

方岳

成期偶縮請從置散之宜詔旨弗俞併下趣行之令聿
臨邦域已布教條臣嘗按輿圖歷觀郡國非不朽然大
也莫若廬山之高其斯宜若小然徒得臣燾而重故凡
五老之山水妙天下正以四書之義理在人心雙朱輪
奚所道哉一白鹿足為重矣何俗吏念不到此使是邦
為之繭焉而臣少不如人晚未聞道必恭敬梓無亦曰
互鄉之童於樂采芹要曾是文學之掾夫何憂患未遂
瞻儀於今十八稔而與世風波終以二千石而識山面

目幸哉承學主此藏書茲蓋恭遇皇帝陛下表章六經
厲精庶政意儒先所至猶庶幾鄒魯之遺凡規式之垂
皆發揮河洛之秘以故頓增於地望諒惟簡在於天心
乃者慨拊髀而思之蓋有不旋踵而屏去使承其乏見
謂非材臣敢不師仰仁賢奉行寬大豈曰前車覆後車
戒固無健決之能將使懦夫立貪夫廉則有典刑之在

洪潛夫曰方吏部氣貌清古音如鐘詩文
典四六不同古律令以意為之語或天出

代趙直閣范謝父忠肅公賜謚表 方岳

星霜代謝未忘沒世之忠雲漢昭回遄舉易名之典感恩之渥有涕其滂伏念臣先臣某起自諸生久膺繁使誓欲捐糜於昭代實繇遭際於先皇凡間外制將軍曾微掣肘儻舟中為敵國安所容身以故十年無游騎之盜遶四境謂老羆之當道乃莫返長沙之舍已懷鵬賦之憂至今登峴山之巔或墮羊碑之淚痛營屯於細柳共尸祝於亢桑於赫旌題聿嚴廟貌木其拱矣尚興當饋之思謚而誅之肆及漏泉之澤此蓋恭遇皇帝陛下

厲精新政拊髀舊臣永惟華袞之褒榮甚凌烟之畫臣
教忠之言在耳移孝之志填膺北過涿鹿而西空同常
負前茅之恨生走仲達而死諸葛尚邀橫草之知

代太府趙寺丞葵辭免恩命表 方岳

提師西援偶退賊於孤城賜詔東來驟進丞於外府雖
懋賞者國家之典然盡忠者臣子之常何有勞能先承
獎賚臣曾微他技實起諸生間嘗聞儒先長者之緒餘
亦羞與武夫健將而等伍迫於師友其義在三憤此強

鄰有死無二迺者敵窺淮甸兵震江流切憂丙枕之莫
遑况復庚牌之甚遽譬之奉漏甕而沃焦釜敢姑徐徐
恨不殪封豕而斬長蛇至今鬱鬱所幸文城之雪夜大
驚淝水之風聲迄解重圍盡奔羣衆此蓋將士三軍之
力與夫守臣百戰之功臣則奚為而冒斯寵伏望聖慈
深念君臣之誼殆將父子之間幹蠱者職分之當然能
家者勲勞之焉取亟賜轉圜之聽毋抱反汗之嫌

代范丞相鍾罷政謝表

方岳

嗟維大耋宜弗巖瞻嘖有煩言尚均祠秩清峻紫宸之
直光華白髮之歸恩與天同涕其雨若伏念臣頃承乏
使遂誤登庸老世故而三折肱何敢試瞑眩之藥陳治
安而六太息詎能施龍驤之斤揆衰殘則罔然祈退閒
之久矣念奏牘未多於造膝而控情幾至於犯顏諒猶
簡在聖心奚以解於物論風其漂女甚槁籜之易危清
斯濁纓固滄浪之自取人言不怨帝力何加而乃盡掩
疵瑕曲成終始上丞相之印不從冊免之規置散吏之

員更假禁嚴之寵洪惟涵育自愧冥頑茲蓋伏遇皇帝
陛下仁及股肱事存體貌知臣山林清苦之素恐亦無
他念臣歲時荏苒之間失於不勇用矜衰朽但與歸休
臣來日無多大恩難報踰七望八既佚老於幸民咸五
登三惟祝釐於聖世

御札訓諭知舉以下謝表 方岳

思皇多士俾呈甲乙之科遐不作人誕布丁寧之訓昭
回雲漢飛躍天淵臣等洪惟國家有道之長進士得人

為盛崇雅正黜浮誕率繇鑒裁之精先器識後藝文豈
但度程之合故以忠厚之論則有若臣軾以混成之賦
則有若臣曾蓋有司既擇於名儒宜貢部不孤於隆指
豈伊臣等可稱上心此蓋恭遇皇帝陛下思格丕平敷
求哲乂方政化更而賢路闢適觀厥成欲俊良登而治
具張無競維烈用勤肆筆申飭持衡臣等敢不仰揆宸
衷旁搜衆彥鑿鑿乎如穀粟之用斯謂實材炳炳焉若
日星之垂敢忘明詔

進百官箴表

許月卿

臣月卿言伏以一飯不忘夙抱少陵之志六箴具列遠
慙德裕之勲敢以愚衷徹于睿聽惟周武建萬邦之極
有辛甲獻百官之箴安不自安聖而益聖憂國愛君父
之念謂吾獨知全軀保妻子之臣慮不及此故東西兩
漢之盛舍楊崔數子而誰仰視虞箴僅堪僕命魏晉以
降文章可知言雖尊主而庇民意則徇華而逐末於修
辭立誠之學類欠實工視正君定國之言殆為虛語本

源既淺氣象自卑并與古韻而失之其於文體何如也
作者馳聲之不乏胡為嗣響之獨難正坐摹規為圓擬
矩為方不知自源而流由本而末宜世道之不古顧民
彝之幸存臣瑣瑣孤寒惓惓忠愛臣於君子於父難忘
懇惻之天史為書瞽為詩莫匪箴規之地念庶人之可
諫矧英主之兼容輒爾芻言庶幾片獻茲蓋恭遇皇帝
陛下舜聰四達湯德又新退而銘於几焉席而銘於端
焉持以小心之翼翼立則見於前也與則見於衡也凜

然大訓之明明未嘗一善之遐遺蓋欲庶僚之交輔恢
洪聖德興起治功臣幸際昌期冒陳宿蘊諫行言聽俾
膏澤之下於民君明臣良惟時幾以康厥事可傳於後

永孚于休

洪杏庭曰山屋肆意為文章不可繩墨獨
所進百官歲高古粹密惻然有愛君之心

賜武舉第一謝恩表

程鳴鳳

臣鳴鳳上言伏蒙聖恩賜臣等聞喜宴于禮部貢院謹
奉表稱謝者集英唱等仰瞻離照之輝聞喜賜筵旋拜
需雲之宴仰承優渥俯極懽愉伏念臣等蚤以詩書淹

于場屋假途黃石剽餘論以求伸賜策丹墀偶強言而
見取猥叨龜列仍忝鹿鳴挈彼控地之踪昇以登天之
路榮矣甚矣恩斯勤斯茲蓋伏遇皇帝陛下清問如堯
好言若禹謂飲食以將厚意匪侈外觀俾忠嘉然後盡
心使知內省致茲駑蹇例受寵光臣等敢不誓殫小忠
力酬大造頭顱已換豈徒溫飽之恩心口自期庶竭涓
埃之報

進曾祖

微

竹洲文集表

吳資深

哀輯陳編悵祖風之悠邈遭逢聖世希宸渥之褒揚進
瀆闕庭退忘鄙野臣竊以唐宗親故笏猶思魏徵之賢
孝廟序遺文誕錫蘇軾之謚或睠求於數世或褒表於
再傳伊人之懷惟道所在臣伏念臣曾祖臣徹生而坎
壈志則激昂抱膝長吟以伊呂而自許著書垂世非孔
孟則不談才狹垓紘氣吞羆虎請終軍之組視表餌之
策非䟽寢淮南之謀於社稷之臣為近挺若偉節著于
當時載觀乾淳之間實號人物之盛朱熹鳴於古歛張

棧顯於長沙浙左二呂之典刑江西兩陸之標致靡不相友咸與齊聲故在膠庠則其行尊歷州縣則其用顯府臺論薦文章公車旒宸歎嘉興思當宁雖懷才之甚遠竟貴志以莫施然禮樂彬彬尚多河汾之弟子而日月炳炳猶存屈氏之離騷儻待時而獲彰庶流芳之不已恭惟皇帝陛下網維治統寤寐英賢聞鉅鹿良將之名思得復用讀上林子虛之賦恨不同時蓋嘗振發潛光褒錄往哲凡曰先臣之雅舊皆蒙諡典之徽稱恐令

太陽之華尚遺枯骨獨使九泉之恨空結營魂臣隕涕
潜然緘書惕若敢冀燕間之賜覽特昭鴻霈以易名起
地下之修文死猶可作效身後之結草義其敢忘臣所
繕寫曾祖臣儆文集總為一十冊謹囊封隨表上進以
聞

讓官表

鄭玉

臣聞高祖開漢不屈四皓之心光武中興終全子陵之
志夫所謂隱士者或因忿世疾邪或欲廉頑立懦故以

恬退為事高尚為風未必皆有康濟之才經綸之學也
從昔賢聖之君所以特加寵異者蓋欲養成廉耻激厲
風俗為天下勸耳臣幼以樗櫟之資深愛山林之趣躬
耕隴畝留情著述初無過人之才忘世之意也茲者伏
遇皇帝陛下以天地為心億兆為念求賢不及從諫如
流謂臣遯跡丘園特賜尊酒束帛以翰林待制召臣聞
命恐悚神識飛揚循牆扣天趨避無所臣竊惟邇年以
來士大夫貪得患失尸位素餐廉恥日喪風俗日壞養

成今日之禍以致盜賊蠭起生民塗炭遂使陛下宵衣旰食憂形辭色累下哀痛之詔布寬大之恩而天下猶未定也今臣復蹈前轍貪冒恩榮不知退避豈惟負陛下知人之明抑亦有妨朝廷進賢之路非臣所以報陛下亦非陛下所以望於臣也蓋臣學問之淺深德量之大小非他人之所能知而臣自知之所謂吾斯之未信者豈敢炫石為玉以自欺其心哉然酒與帛天下所以奉陛下者陛下得以私與人臣不敢辭也名與器祖宗

所以遺陛下使與天下之賢者共之陛下不得私與人
臣不敢受也伏望天慈特賜俞允收回恩命容臣以布
衣赴闕入覲清光攄其一得之愚以為消埃之助然後
退處山林詠歌堯舜以樂太平實臣至幸也而使者坐
驛有司臨門迫臣就道必欲令臣親詣辭免臣累更憂
患素抱羸疾道路勞役至于海上復感風痺不能前進
謹奉表以聞

乙巳年千秋節賀牋

朱模

五百年有王者興適當今日千萬歲願聖人壽茂對昌

辰天地協祥臣民交慶

中賀

繼天立極敘福錫民應禱

而生彌誕神光之室乘時而起肇基王氣之都是皆天
眷之所隆夫豈人謀之可致故十載克成乎大業而四
方益闡於丕圖江漢既已朝宗閩廣固宜職貢餘浙正
須秉麾而順邊淮豈待仗鉞而從蓋將北定乎中原抑
宜入承乎正統一人有慶萬福攸同某等遠牧虎藩遙
瞻象魏莫克對紫宸而拜益深抱丹悃之誠航海梯山

重譯悉圖於王會普天率土三呼咸比於華封

洪武戊申賀即位表

此下三篇代鎮
撫劉總制作

陳光

開億萬年之洪基丕昭乾運履九五爻之尊位茂對泰
交海宇同風人民胥慶欽惟皇帝陛下由舜仁義蕪堯
武文好生格上天之心創業溥聖人之智駐蹕江左黔
黎先被於來蘇直指中原黃圖即覩於無外肇登大寶
俯徇輿情臣猥以凡才忝司戎寄爵位有守莫陪冠冕

之聯班虎拜惟寅遙慶車書之混一

賀中宮箋

陳光

帝同乾運兼資內治之功后協坤儀茂正中宮之位九重有慶四海騰歡恭惟中宮殿下稽時為春自天作配柔嘉維則式歌正始之音溥博無疆特著順承之德膺臨軒而發冊專主壺以齊家光啓椒房益綿瓜瓞臣忝司外鎮阻奉中朝覩日月齊光之辰曷勝鼇抃衍壽富多男之慶長迓鴻禧

賀東宮牋

陳光

正月維新茂建震宮之長前星增耀肇開泰運之隆一人元良萬方歡慶恭惟皇太子殿下式膺儲貳密領撫監整鶴駕而有嚴大符民望聽雞聲而問寢上悅天顏邦本崇磐石之安皇圖益維城之固臣忝鎮練水莫造筭班職守是拘惟仰日月重熙之運頌歌有永遠同海嶽戴德之誠

乞恩歸老奏

程信

兵部尚書兼大理寺卿臣程信謹題為乞恩歸老事切
惟古者天變垂象為大臣者或上賜策免或自劾罷歸
載在史書以明示戒茲者彗星為災聖情憂懼正君臣
交修之日而犬馬之心非不自念仰承天地之恩圖効
涓埃之報奈何老病侵尋有加於往昔才識短淺無補
於聖明邇來言官以御史方漢與臣爭坐造言傳誣交
章論列俱蒙聖鑑孔昭臣不更析但其言臣妨賢一事
誠為至當臣已三疏懇乞休致聖慈眷勉至於再三感

恩撫躬不能自己况近世以來士風委靡公議混淆致災之由或出於此使臣不知去就之機猶致是非之辨則已涉於固位保祿之嫌益非皇上弭災消變之意是以不避罪愆披露衷悃雖皇上詔旨以大臣輕去為恤以人才難得為念自臣觀之凡今列職庶位有愛君上惜國體能不為人頤指氣使者皆可用也何惜臣一人而不上念天變下恤人言矧臣犬馬之齒已迫衰朽風濕之疾動踰歲年眼目昏花精神減少家居之時一惟

凝坐趨朝之際必藉人扶力已殫於一身心徒存乎報
主理宜懇乞骸骨歸老田園伏望皇上憐臣衷情將臣
放歸閒住以荅上天之譴以完老病之軀且以見朝廷
於大臣全進退之禮薦始終之恩出於前古萬萬也臣
不勝激切懇祈之至

南京叅贊機務謝恩奏

程信

南京叅贊機務兵部尚書兼大理寺卿臣程信謹題為
謝恩事先奉勅諭命臣南京叅贊機務兼理部事臣已

於成化六年十一月二十八日至南京會同守備太監
安寧李秉唐慎成國公朱儀等到任管事訖臣本一介
書生仰荷累朝知遇雖數叨於任使曾無補於聖明往
者濫督王師出征蠻徼因犯瘴癘之毒寢成痿痺之軀
荷蒙皇上俯從廷議起臣於在告之餘特下綸音授臣
以機宜之任夫南京乃祖宗根本之地而叅贊實古者
留後之臣必得老成之人庶副保釐之寄如臣駑鈍豈
克勝堪既免其入謝於朝以逭奔趨之苦復賜之璽書

而往以重機務之權加之面諭叮嚀恩賚優厚顧才弗
稱撫已深慚竊念唐韓弘以末疾而憲宗特命肩輿護
軍宋富弼以足疾而神宗特許子扶入對微臣才劣實
愧先賢聖主恩深有加前代臣敢不益堅素節固守愚
忠操理兵戎恪遵聖訓潛消寇變綏輯邦畿務收微效
於涓埃仰答大恩於天地遠瞻楓陛更獻莛言伏望皇
上興文事修武備永垂宗社之規親君子遠小人協副
天人之願臣不勝惓惓感恩激切之至

欽定四庫全書

新安文獻志
卷四十一

十六

新安文獻志卷四十一

欽定四庫全書

新安文獻志卷四十二

明程敏政撰

啓

賀李右丞綱啓

汪藻

伏審恭被策書進居丞弼精忠貫日正二儀傾側之中
凜氣橫秋揮萬騎笑談之頃國須賢立天為時生恭以
某官厚德鎮浮英材經遠得文武弛張之樞要獨運習
中明古今治亂之淵源不專紙上爰自踐揚之始每勤

獻納之忠老成尚有於典刑天下想聞其風采昨屬強鄰之擾上貽當宁之憂夕烽既徹於甘泉清蹕將遊於汾水惟公夙夜與國存亡挺身六品之卑抗議九重之邃留家誓死鑱血書詞銷大變於胚胎轉危機於呼吸洎干戈之指闕授桴鼓以登陴義動三軍人皆奮死威行萬里敵已請盟身雖九殞以一生國則崇朝而再造既名高而衆媚乃讒就而身危士訟公冤亟舉幡而集闕下帝從民望令免胄而見國人游經艱難益見奇偉

方主上清明之今日實邦家希濶之昌期欲衆賢同建
於事功非雅望孰為之師表將萬世維持之是賴何一
時康濟之足言某久託餘光欣聞盛事雖無緣進旅退
旅陪賓客之後塵豈不能大書特書續山林之野史巖
廊多暇歲律方春願精寢寐之調用副蒼生之望

陳定
宇曰

李公公忠文武碩德全材靖康之難極力扶持建炎之
初沮於讒口太學生陳東詣闕乞罷汪黃用李綱士民
不期而集闕下者數萬未幾有
此除浮溪以啓賀之事詞俱妙

徽州到任謝執政啓

汪藻

誤膺明詔擢領偏城地接行朝蓋今日股肱之郡世聯
編籍乃平生父母之邦起廢恩深叨榮愧甚蓋念某一
從去國十見周星投迹異州誰復過門而問字疲精斷
簡徒知仰屋以著書敢圖三錫之餘乃假一麾之便遵
途浹日入境班春城郭重來疑千載去家之鶴交游半
在或一時同隊之魚退省憫然曷為臻此惟蟠木離奇
之為器自大鈞塊軋以無垠茲蓋伏遇某官間世真儒
中興名相坐籌帷幄收四方人物之英端委廟堂復萬

里輿圖之舊俯憐衰朽久遂退藏爰力挽於江湖俾再
臨於民社尋童子釣遊之處雖就榛蕪望先人丘墓之
墟已寬夢寐幸士思之粗慰宜民瘼之深求某敢不專
務撫循仰分憂顧褰帷問俗姑縈衣錦之歸上印還家

終冀揮金之樂

黃氏東發曰城郭交游
一聯此瀟灑出塵之語

賀韓樞密

肖胄

啓

汪藻

伏審光膺詔冊進陟機廷既廊廟之得人知朝廷之能
國恭以某官清名藉甚雅望歸然四世五公門閥獨高

於天下十事九律計謀有補於國家徧揚清近之班深
結聖神之眷回翔滋久僉屬實勞惟豪傑之士無待而
興難稽經濟況公侯之家必復其始果被簡求某蚤辱
誤知欣聞休命屬拘攣於印紱阻趨造於門牆暑令清
微政塗豐暇冀慎鼎茵之節永為宗社之休

賀張韓岳三帥加樞密使副啓
汪藻

伏審誕告明廷延登近弼運籌決勝久分疆場之憂當
軸處中遂正廟堂之位折衝雖舊注意惟新恭以某官

稟氣雄剛受材英特任心膺爪牙之寄積旂常鼎鼐之
勲惟文武以兼資故君臣而默契昨屬羽書之急親煩
幕府之行軍容一陳士氣百倍殄萬里憑陵之敵安兩
淮震擾之民累歲賢勞蟣蝨幾生於甲冑一朝醲賞貂
蟬果出於兜鍪某早托餘光欣聞異數偶左符之拘綴
阻東閣之進趨暑氣方新政塗多暇冀慎寢饗之節用

承旒宸之休

金陀粹編云三帥之拜以啓賀者甚衆惟汪公蟣蝨貂蟬一聯人亟稱之

賀毛察院啓

汪藻

伏審親奉詔除進居言責開衆正之路立太平之基結
知方深有識相慶朝廷以數聞直聲為盛治之世君子
以得行已志為光亨之時然下或依違而不能充上所
求上或忌諱而不能窮下所學歲月忽焉已至功烈如
此其卑求一舉而兩全曠百年而幾見若處盡言之朝
而叅風憲之任當正色之地而得人材之英舉世所推
非公誰可恭惟某官閣下性合天道材周世資經術自
為名家文章不隨人後傑立千百輩上一時爭慕於風

流漂泊十五年間萬口皆為之歎息起自江湖之遠歸
從鵝鷺之游廣廷纔望於清光即日立登於要路付柱
後惠文之事觀胷中雲夢之奇蓋嘗聞議論之崢嶸知
能救風俗之頽靡當令藜藿之不採無致玉石之俱焚
張膽明目於數步之間收功立名於萬世之後雖行藏
豈不在我恐彈擊非以處公行被褒嘉別躋禁近某離
羣甫爾間問欣然知公道之得人雖懦夫而增氣春律
晚晚臺網靜深願為清望以自持當有神明之陰相

復待制謝宰執啓

程 俱

毀瓦畫墁久竊真祠之祿簪筆持橐再塵法從之班誤
膺綸綍之恩仰愧陶鎔之賜伏念某生而孤蹇老益鈍
頑操心也危每謹樞機之發臨事而懼不踰繩墨之間
洎忝備於論思益勉圖於報塞斷斷之愚曷有區區之
意已疎省咎空山驚五年於過隙噓枯寒谷與萬木以
皆春怵惕靡寧悵有在此蓋伏遇僕射相公忠嘉致
主勲畧濟時八柄詔王畢協至公之道百工熙績率由

亮采之功既樂善以達人每棄瑕而觀過致茲拙戇亦
預甄收病馬已疲豈有騰驤之意老櫟無用庶全擁腫
之生過此已還未知所措

賀程待制邁知溫州啓

朱松

伏審甫趨召節亟拜綸恩延對西清雖竭嘉猷之告偃
藩東道重違榮養之求諒惟物望之僉詣豈獨私矜之
欣屬恭惟某官材高國棟望重耆英踐履純明凜奉身
之一節風猷強濟歷盡瘁之百為越從記注之嚴出總

委輸之寄被恩言於三錫素簡清衷席峻望以九遷待
周華貫丐便親與之養就分帥閩之符俘大海之鯨鯢
出遺民於塗炭果膺號召益見推明陟降殊庭副仄席
輟喰之歎藩宣外服有擊鮮歲綵之歡度少愒於名邦
即進嬰於密務某門闌下列鄉黨晚生鑿朽不謀了無
心於經世斗升自役方苟祿以逮親謬蒙收錄之恩因
有攀援之意陰虬自躍儻密會於風雲朽木難雕或蒸
成於芝菌永言欣懌莫罄敷宣

與趙經幹啓

汪應辰

伏審既被辟書即奉俞旨轅門增重桂嶺有輝伏惟某
官蔚以卿材生於公族信厚皆如麟趾夙著清芬絃歌
焉用牛刀亟登最課屬南邦之開鎮虛右席以招賢雖
之處於囊中昔已知其特異羅而置之幕下今豈待於先
容姑藉佐戎之謀實為儲帥之地應辰失德云久竊祿
于茲將承謦欬之音更託悵懔之庇其為忻忭豈易敷
陳

與李提刑啓

汪應辰

伏審欽奉詔書淳持憲節先聲云洎輿論交欣恭惟提
刑敷文識慮精明才猷宏博仙李之根遠矣世德彌芳
棠棣之萼粲然相門未艾視彼黃閣實吾青氈而乃俯
就外官坐成遺老郡守監司之寄幾徧歷於四方門生
故吏之餘或先登於要路矧茲夔峽亦辱使輶庶獄糾
紛幸平反之無害疲民凋瘵賴賑恤之有方苟種德之
可為豈屈身之足問顧惟懶拙久幸依承茲復同寅庶

幾蒙益枉誨音之良厚知眷意之特隆感愧之懷敷陳
罔既

上虞宣撫

允文啓

汪應辰

伏以經武斗樞之庭宣風井絡之野安危所寄內外惟
均注意特隆具瞻胥慶恭惟宣撫樞密知院受才闕博
蘊德純全以孝為事君之忠以仁為救物之勇我戰則
克蓋傳心於聖門匪夷所思獨取必於天理經畫世故
調和政幾無施不宜有本如是雖舉身而遠引亟承命

以遙歸惟蜀僻在一隅惟帝明見萬里當宁太息命公
往釐靡憚暑行之勤以寬旰食之慮制勝堂上即坐收
於全功拜相軍中當復見於盛事益沛為霖之潤永扶
置器之安某拙疎無庸知照有素免於罪戾悉繫庇冒
之然奉以周旋茲復趨承之幸其為欣忭實倍等夷

還鄉謝人惠書啓

朱 熹

遠勤車蓋已欣獲奉於清標寵被函書復喜與聞於雅
趣第慙哀陋莫稱揄揚雖請誦其所聞蓋嘗自竭尚敬

修其可願式副深期過是以還未知所報

代賀張魏公除樞密使督軍啓 吳 儆

光膺策命進長樞臣兼太公九伯之征督安石諸軍之事士氣百倍輿論一新某官命世奇才應期碩輔盡護諸將威名素震於邊郵再造皇家勲烈獨高於今古屬太上兼南北之變而宗臣更內外之除二紀山林益係四方之望同時將相獨遺一老之尊蓋天心有悔禍之期留人傑為興王之用果亟還於湖海畀專付於江淮人

心恃為長城國勢重於大呂將成功於不世復出命於
非常會羣后以徂征當無待七旬之格至太原而薄伐
期立成六月之功某頃守留司深虞邊鎖頗豐府庫以
備師徒逮茲幕府之開乃在海隅之遠莫預功名之會
徒深傾屬之私羽檄交馳籌惟良勩願謹饗飡之節永
孚家國之休

與桂帥張南軒先生啓

吳 儆

大纛高牙想制閭威容之盛屬韃戎服望轅門兵衛之

嚴欣悽交懷夙宵假寐某官淵源聖學師表儒林惟有
之是以似之太戊贊于伊陟在賢者識其大者孔子傳
之孟軻凡開物成務之殊功皆養氣存誠之餘事用能
弘濟於艱難之日而雍容於進退之間雖素位而行不
願乎外然當今之世舍我其誰徒以交廣要衝朝廷最
遠蠻貊賴威懷之畧兵民須鎮撫之宜官守恃遠而或
媮邊防循習而或弛久資輿望肅付戎昭宅南交秩南
訛時重義和之命覺斯民以斯道況當堯舜之時我公

其歸天子有詔某州縣下列庠序陳人章句誦習之雖
勤塵埃奔走之亦久退不能為一身之計進不能取當
世之資嗟壯志之幾何已隣哀境抗塵容之若此敢意
榮途顧以罪戾之餘宜置蠻荒之表故雖遠戍敢嘆遐
遺不圖流落之餘獲託照臨之下以身受察引領自歸
雖仰視墮水之鳶不堪上驚幸南飛遶樹之鵲未嘆無
枝

謝洪徽州迺撰休寧縣學記并書啓

吳 儆

木鐸振文已新羣聽銀鈎備法更偉遐觀凡與承學之
流實佩宣風之賜竊以十室之間必有學蓋黨庠塾序
之遺凡學之立皆可書實魯頌頌頌宮之意苟學之不講
則德之不修而言之不文亦行之不遠惟休寧右儒之
化自潁川筮仕之初載新黌宇之卑用振文風之陋衡
湘為進士皆以子厚為師齊魯言春秋悉本胡毋之說
積二紀漸摩之久號一時人物之蕃伐石冶金未有無

窮之託思人愛樹空懷勿翦之心豈期名世之賢乃假
陋邦之守爰捫衣而願紀蒙泚筆以頌成炳若丹青既
不渝於悠久馮之琬琰當有補於將來恭惟某官道德
高古人言語妙天下聲蜚實茂豈碌碌瑣瑣餘子之為
事信辭嚴得是是非非聖人之意坐令窮僻寶此瑰奇
奉以周旋敢怠書紳之戒更相告語庶消弭筆之風

謝辛大卿 勿安啓

羅 願

受察公朝本由推轂疏恩列郡亦既懷章退省孱庸惟

深盛荷伏念某頃為別駕得近行臺表於屬吏之中期以古人之事萬乘之器乃取蟠木以為容千石之鐘至為寸筵而發響遂闕淵聽旋被明揚揆以生平知我莫如於鮑子聞之道路逢人更說於項斯意朝廷諸公之賢多門牆一日之雅儻非憑藉曷有超踰茲蓋伏遇某官文武兼資公忠自許胷次九流之不雜目中萬馬之皆空見輒開心不假超超囁嚅之請稱之極口率皆沈著痛快之詞褒袞甚榮夢刀既叶李布河東之召譽偶出

於一人袁安楚郡之除選第因於三府至如羈跡全賴
公言慙非共理之良曷稱同升之誼某敢不勤宣上意
毋負已知薦長史而稱宰相之才事無近比期國士而
用衆人之報人謂斯何抱此愚心要之晚節

回通判劉寺簿

子澄啓

羅願

登門甚寵夙依君子之光儀得郡鼎來首見故人之姓
字況以一時之雅望攝行千里之化權方託交承預深
欣忭恭惟某官行無瑕玷學有本原表喬木於百年蓋

導故物器蟠木於萬乘非假先容頃前說於詩書遂入
司於禮樂茲屈題輿之寄不辭越俎之勞度今日之事
為力求其故既後來之善繼兆足以行儻非其人恐孤
此意顧歷官何算執事所知屬恭對於天顏荷晉遷於
地望武昌夏口人知三國之戰爭漢廣江沱古有二南
之風化皆吾人之所誦與聖世之宜先幸嘗交伯仲之
間況其寄吏民之上方資警誨小效施為益招耒耜之
民庶當有補稍弛錐刀之利茲固無難歲序崢嶸風威

栗烈祈謹衛生之節即詣請益之私贊詠之悰敷宣罔
既

登第後謝舅汪公仲和啓 王 炎

纔知丁字詎能起於儒家濫玷乙科實借輝於母黨未
及造門而謝遽勤飛翰之頌靜言思之得罪多矣重念
炎天資陋甚生計蕭然無負郭五十畝之收烏能餬口
雖插架三萬軸之富何足謀身自傷偃蹇之蹤敢有飛
鳴之望偶緣天幸獲廁時髦茲蓋伏遇舅長學探根源

識精藻鑑謂生子必過其父固誤深知然非舅安有此
甥亦由餘庇炎敢不銘心自勵銜德無忘題進士科名
已覺傲榮於此日成外家宅相敢期振跡於他時過此
以還未知攸措

代張帥撰除直閣謝宰執啓 朱權

邊庭息警曾微服遠之功內閣陞華亟被陟明之典辭
榮靡獲拜命自慚顧惟叨忝之優知有遭逢之幸伏念
某材拘近用識昧通方偶際過於明時浮馳驅於煩使

乘軺而逾五嶺曷著能名授鉞而總十連復叨重寄蓋
自虎符之始合遽聞羽檄之交馳潢池弄兵青海傳箭
雖守邊兆釁之有自而制閭任責以何辭警之以誅討
之威開之以懷徠之意粗能集事苟逭乏興溫綸顯播
于漢庭異寵就加于堯閣循牆退避莫回天聽之高望
闕祇承未覺日邊之遠靖言傲冒端有夤緣茲蓋恭遇
某官公議權衡盛時冠冕振平章之道治具畢張居董
正之司人材允賴致斯茂渥下逮微勞某敢不仰戴恩

榮力圖報效撫綏殊俗毋求赫赫之功告語後人尚守
平平之策

上刑部李尚書啓

朱權

召以十行躋于八座元戎治最久說禮樂而敦詩書司
寇位尊乃詰姦慝而刑暴亂正人居要善類交欣恭惟
某官偉識際天宏猷經世材雄梁棟克勝任於明堂器
重璫璣雅凝珍於清廟早由人望親結主知獻納於日
月之間持荷地禁步武於星辰之上聽履班高自分帥

閫之嚴兼領制垣之重雅歌投壺折衝萬里綸巾羽扇
指麾三軍上促衮衣之歸公秉介圭之覲從容賜對密
勿告猷擇乎人材景周公之立政張其綱紀契揚子之
法言見幾察微而消患於未形深防預備而保治於已
定此皆濟時之上計無非愛君之至言猶北斗之在天
既司喉舌之要率東方而居左即拜股肱之良顯冊非
賒奮庸可必伏念某黥山窮學壁水陳人兩舉而玷儒
科粗償力學之苦六考之為邑掾苟追曠官之虞曩以

一介而負承嘗叨二天之巨庇與義檄於告行之際賜
谷札於報書之間深感隆私敢忘高義茲獲聆於盛事
喜倍切於卑悰拾級西階阻莫陪於簪履曳裾東閣願
終託於陶鈞頌詠惟深敷宣曷既

與錢教授啓

朱權

振藻上庠舊識文章之宗伯哦松下邑茲逢賢道之師
儒諒同舍之不遺幸為寮之有託將趨丈席敢貢尺緘
恭惟教授大中學探藝源行高人表瑰詞華國錫擲地

之金聲清節冠倫聳叅天之黛色早蜚英於學省巍擢
第於宸廷來游鵝墨之邦姑庀鱣堂之教青芹在泮豈
久駐於談經紅藥翻堦即迅登於掌誥某迂疎末學躋
蹬畸人予不負丞而丞負予以為不勝其任也我匪求
蒙而蒙求我方就有道而正焉祈嚮之私敷揄莫罄

賀趙徽州啓

程 珌

曉朝丹闕嘗隨冠劍之塵春入黃山近望旌旗之影方
念拂縑而自贄顧蒙蜚翰以相先有懷恭梓之言寧免

負芒之愧某官家承懿學天予長才唯能沈浸於古今
是用發揮於事業早膺妙簡亟造周行雖舌含香僉共
期於得路虎符分竹乃自請於為州惟是新安今為屏
輔洞深雲紫昔賢嘗慕於空仙人悴煙青近歲不知其
生聚自聽顯除之命咸興來暮之歌今者卜日開牙諏
辰布政澄光拖練頓清門外之溪喜色映人更好城頭
之柳某無從望履徒切搖旌與田野之氓雖切傾於善
狀選郡國之表諒難久於偏州贊頌惟勤形容莫既

回五城黃制幹雷利賀生啓 程元鳳

尋盟洛社驚蓬門六矢之垂寄興郢歌辱梅驛一枝之
貺如咸之感佩謙之光恭惟某官羅星斗胸挾雲漢手
非絲非竹宛然五十絃之鏘如松如椿侈以八千歲之
祝揆情則過忒意良勤崖約一箋莫敵黃綃幼婦之作
珍藏十襲頓增白髮老人之華

周禮得舉謝啓

方岳

聖天子新治平之政飭士習者再三鄉大夫登賢能之

書推禮經於第一凜有盧前之愧喜無牛後之嘲何德
堪之為幸多矣試嘗謂士生堯舜之世誰不欲身致晁
董之科矧惟琴瑟之更張豈復笙箏之雜襲風飛雷厲
漢札十行地闢天開唐文一變乃酌計偕之願聿回儒
學之心于然而來卓乎其傑猶共逐中原之鹿人人自
謂得之至獨為前列之龜區區祇有慚耳顧如某者僅
若而人結髮從諸公之遊切攷太平之典束書有四方之
志願為君子之儒雖極知文舉之才疎未易詆洛陽之年

少一燈夜雪兩載秋風思昔故家起魚龍而沐日翳我
季父猶鵬鶚之在天寥乎相業之無傳幸而書種之不
絕賈子餘勇與衆先登孰云揚粃之前或歎穿楊之巧邑
有故事人多誦言謂疇昔當甲午之元嘗魁北斗以春
秋無已亥之誤遘冠南宮意其氣數之循環有此功名之
故的茲蓋伏遇某官蜀文翁之教化今韓愈之聲光扶
雲漢分天章涵浸詩書之澤呈琅玕呌閭闔濃薰翰墨
之香言觀才屈宋而道義皇將使家臯夔而人稷契玉

我文明之治鏘然熙治之朝有嘉燕凝不知螽躍迄致
遼東之獻亦空冀北之羣某敢不連拔茅之征乘破竹
之勢鳥之鷙累百數而不如鶚已先雌伏之卑鯢之大
幾千里而化為鵬遙借乘風之便丹衷所屬尺牘奚殫

代賀袁大監甫啓

方岳

恭審渙發綸函晉陞繕監帝曰茲惟師匠入紬金匱之
書時則有若儒宗無負玉墀之對夫以海內寡二之學
蚤收天下第一之科十年而到鳳池竊以為晚五工之

居雉正其謂斯何獨喜端人之登可為清朝而賀恭惟
某官緒守挈齋之訓親得慈湖之傳吾之心即周孔之
心曾何求於紙上所謂道非堯舜之道不以陳於王前
方其發諸詞章初無意於科目九萬里而風在下奚計
修程三十字而日未斜特其餘事出用於世欲行所言
第觀使指之將明夫豈儒效之迂濶乘輅而講荒政溺
由已溺飢由已飢駐車而談聖經仁者謂仁智者謂智
洪惟箕翼之魁宿端是青齊之福星蓋其所懷之春或

者不言而化人皆憚汲黯此聲在江之東上不見賈生
有詔自天而下若曰咸五登三欲帝萬世卿其襲六為
七作宋一經不然營繕之勞曷究彌綸之蘊某不量其
戇敢誦所聞竊惟古之共工皆有關於世變如制度之
先樸將風俗之再淳作大匠箴而獻諸朝尚何容喙讀
梓人傳而知為相所願留情

代賀趙大資葵啓

方岳

恭審誕播制函峻班書殿真儒無敵於天下帝其寬北

顧之憂此屬已在吾目中時則有東歸之喜於皇王佐
允穆宗工恭惟某官識際天人勲在社稷蜚聲輶轡於
五緯有管夷吾則何患為著書羽翼乎六經皆孔安國所
未到者惟其平生不為紙上之學以故倉卒能吐胸中
之奇屬烽燧之障天鼓鼙而略地顧何負於漢賊折
尺筭而筭之所未下者聊城不遺鏃而歸我方為宗國
無窮之計盡復寧人有指之疆誓將挽九河以洗氛埃
詎曰畫一江而限南北皇靈斯赫儒效豈虛言觀疇昔

之所成奚至今日而未相翳股肱之寄在忠力當據坐
論之謨然道德之威成安強正賴折衝之畧特異優崇
之典陞華禁邃之庭增重麟符眡儀鴻閣詞掖下絲綸
之制蓋一命再命三命而益恭太常兼鐘鼎之銘其大
書特書屢書而未已丕視功載厥有彝章靈夏未服而
韓相行共倚琬戈之重貝州既平而潞公入過觀几烏
之還某嘉與斯人鋪張偉績藏在盟府夫誰曰彭越之
同功訊之司宗抑豈比汾陽之異姓式俟介圭之覲具

隆巖石之瞻聞邊吏之戒餘氛洗甲兵而不用謂中國之相司馬讀制冊而可知仰斗之私與江俱下

代賀高運使啓

方岳

伏審輟自鵷墀誕分虎節引星辰於碧落有開蜀道之天將禮樂之皇華不遠長安之日竊窺帝意深有廟謨若曰當宁思古名臣其維武侯為時王佐每讀出師之表無慙伊訓之書雖吳魏自裂而三分豈漢賊可岐而兩立草廬所蘊竹簡莫傳蓋臥龍之蟄匪徒然翳流馬

之運其小者乃睠西土而凜有遺跡寬予北顧者詎無
若人幸今天道之好還大快人情之共憤何止扼吭而
拊其背已焚老上之庭恨不食肉而寢其皮爰戮防風
之骨然滅夏之未幾方隣敵之可憂試嘗以唐書與五
代史而攷之其見於中國亦三百年而餘矣既懷殘而
相啗會肆欲之無厭如使馳突於封域之間奚啻鼾睡
於臥榻之側吾恐患方深耳見謂一秦之復生公其起
而圖之縱無百參而何缺若然則朝家之委寄夫豈惟



使者之將輸聞之縉紳偉哉綸綍恭惟某官道山蓬萊
之胸次楚澤雲夢之筆端當其排閭闔而呈琅玕信已
跨崑崙而餐沆瀣廼煩視草出董飛芻意者復周土宇
而興六月之師其必張漢天聲而決千里之勝飽吾貔
虎取彼鯨鯢折尺箠而笞之不留敵以遺君父無隻輪
之返者迄安邊而立功名使鼎湖弓劍之藏與渭上衣
冠之廟王氣開而天地闢邊塵靖而河洛清則多多益
辦之勛皆陳陳相因之助以使誦言於諸葛不復比數

於蕭何某布所聞匪為之佞逢此盛舉未嘗不歎曰江
左之有夷吾遲之幾何將亦相戒以中國之相司馬惟
抵掌而談天下之事敢折腰而及吾身之私其若翹瞻
莫殫忻頌



新安文獻志卷四十二